

UNDP parseiru ho Austrália atu hametin koordinasaun no kooperasaun iha
Sistema Justisa



SIMPLÍCIO BORGES, OFISIAL JUSTISA IHA PROKURADORIA DISTRITAL DILI, RONA
INFORMASAUN DEKLARASAUN EMA NIAN NO HATAMA KEDAS BA SISTEMA ELETRONIKU.
PHOTO UNDP/TL

Dili – UNDP no Departamentu Relasaun Esteriór no Komérsiu Austrálianu (DFAT) asina-ona akordu ida atu apoiu ba programa UNDP nian ne’ebé konsentra ba tempu naruk iha fortasesimentu Sistema Justisa iha Timor-Leste. Iha akordu ne’e, asinadu iha loron 10 Fevereiru 2014, DFAT aloka osan hamutuk US\$.608,702 mai UNDP ninia “Konsolidasaun Estado de Direito Democrático no Pas liu-husi Sistema Justisa ne’ebé forte iha Timor-Leste”, ne’ebé mak koñesidu hanesan Programa ba Sistema Justisa (PSJ).

PSJ servisu hamutuk ho Ministériu Justisa, Tribunál, Ministériu Públiku no Defensoria Pública atu ajuda dezenvolve sistema justisa ida ne’ebé forte no efikás, no atu garante asesu ba justisa ba sidadaun Timoroan sira. PSJ ninia lansamentu iha tinan 2003 liubá no daudauk hahú ninia faze ba dala-haat ba períodu 2014-2018.

DFAT ninia apoiu sei konsentra liuliu ba iha hadi’a esforsu koordinasaun liu-husi estabesimentu husi projetu Sistema Jestaun Informasaun Integradu (IIMS). IIMS mak série husi sistema jestaun informasaun eletróniku iha instituisaun ida-idak. Sistema IIMS ne’e lansa liu-husi konsensu husi Konsellu Koordinasaun iha Marsu 2010 no IIMS mak parte xave ida husi Planu Estratéjiku Setór Justisa nian.

Parte individuál sira husi IIMS mak daudauk operasionaliza iha Polísia, Ministériu Públiku, Prizaun no Defensoria Pública, fasilita instituisaun sira ne'e atu jere di'ak liután sira-nia informasaun. Tribunál mak sei sai faze finál husi teste ne'e molok sistema hahú la'o iha Abríl 2014. Bainhira sistema ne'e ligadu ba instituisaun hotu-hotu, IIMS sei permiti atu iha akompañamentu ba progresu husi kazu sira husi inísiu ho atividade polísia nian liu-husi prosesu legál, no ho nune'e, atu garante rekolla no avalia informasaun estatística ne'ebé loloos. IIMS mós sei fó apoiu ba Governu atu tau-matan ba progresu husi instituisaun justisa sira no atu sukat efikásia no dezempeñu hasoru indikadór sira atu hadi'a fiar husi públiku sira-nian ba iha seitór justisa.

Dezde ninia kriasaun iha tinan 2003, Programa ba Sistema Justisa UNDP nian kontinua atu alkansa impaktu iha dezentvolvimentu no kreximentu husi Timor-Leste ninia sistema justisa. To'o agora, iha ona Juis, Prokuradór no Defensór Públiku 51, inklui feto nain-13, mak graduadu liu-husi tinan-rua-ho-balun ba programa majistratura husi Sentru Formasaun Jurídika (SFJ). Servisu Notariadu agora disponivel iha distritu-haat sai-husi Dili mak (Baucau, Oecusse, Ermera no Suai). Programa Formasaun ba Formadór hahú-ona iha tinan 2013 ne'ebé sei indika ba redusaun ba dependénsia ba formadór internasionál sira. Tribunál Móvel mak lori justisa ba sidadaun sira iha fatin remota sira, atu redús tempu no kustu husi sidadaun sira ne'ebé mak tenke mai iha Dili. Rezultadu mak redusaun substansiál iha kazu pendente sira no halo justisa sai asesível liu ba sidadaun timoroan hotu-hotu.

Ba informasaun liután kona-ba Programa ba Sistema Justisa mak favór-ida bele kontaktu ba Joana Saraiva, Asesora Komunikaun iha joana.saraiva@undp.org ka +(670) 78078108.

Kona-ba UNDP: Programa Nasoins-Unidas ba Dezentvolvimentu (UNDP) mak rede-servisu dezentvolvimentu global Nasoins-Unidas nian, ne'ebé servisu iha nasaun no territóriu hamutuk 177. Iha Timor-Leste PNUD fornese konsellu no asisténsia tékniku atu harii instituisaun públiku ida ne'ebé metin no ho kapasidade iha nivel nasional no sub-nasional iha justisa, parlamentu, direitus humanus, anti-korrupsaun, polísia, ekonómiku, dezentvolvimentu, jestaun ambientál no jestaun risku dezastre ne'ebé lori dezentvolvimentu, pás no justisa ba populasun no atu to'o ba iha seksaun ema-kiak no vulneravel husi sosiedade ne'e.

Kona-ba Programa ba Sistema Justisa UNDP: Programa ba Sistema Justisa (PSJ) ho objetivu atu apoia instituisaun justisa Timoroan nian atu fornese sistema justisa ne'ebé justu, efisiénte no efikás ba hotu-hotu iha Timor-Leste, no atu hadi'a asesu ba justisa ba ema-ki'ak no ema-dezfavoresidu sira, tuir ho Governu ninia Planu Estratéjiku ba Seitór Justisa (PESJ). PSJ servisu hamutuk ho Ministériu Justisa, Tribunál, Prokuradoria Jerál Repúblika no Defensoria Pública Jerál. PSJ lansa ba dahuluk iha tinan 2003 no daudauk hetan apoiu husi Governu Austrália, Brazíl, Japan, Noruega no Portugal.